



Uunga siunnersuut: Ilinniarfinni aamma ilinniagaqartut ineqarfiini aangajaarniutininik atuisoqartarnersoq pillugu misissuisoqartarnissaa pillugu Inatsisartut inatsisaat nr. xx, xx 2016-imeersoq.

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)
(Siullermeenera)

Ikiaroorartumik hashimik allanilluunniit aanngajaarniutininik sunnerneqaqqaguit taava ilinniarnerit paarisinnaangilat pitsaasumik qaatusimallutit atuarninnut naleqqiullugu. Maani nunami ilinniarneq kikkunnut tamanut akeqanngilaq, ilinniartitaanermullu inuiaqatigiit annertuumik aningaasartuuteqarput. Tamanna tunngavigalugu inissaminiippoq, inuiaqatigiit ilinniartunut assigiinngitsunik piunasaqarsinnaanissaat. Piunasaqaateqarsinnaanissaat qularnaarumallugu, ilinniartut pitsaanerpaamik ilinniarnerminnut malinnaanissaat.

Manna siunnersuut aqutugalugu Naalakkersuisut kissaatigaat ilinniarfinni aamma ilinniagaqartut ineqarfiini aangajaarniutininik atuisoqartarnersoq pillugu misissuisoqartassasoq. Tassunga atatillugu pingaaruteqarpoq erseqqissaatigissallugu tamatumani tunngaviussammat tigussaasumik ilinniartunut pasitsaassaqaarsimanissaq misissuisoqassappat. Allatut oqaatigalugu, ilinniartut tamarmik tiitorfimmuut quisinneqarnaviangillat ilinniarfinni ilinnialissagunik.

Inatsisissatut siunnersuutip § 6-ani tigussaasumik ima allassimasoqarpoq:

"Aangajaarniutininik atuisoqarsimasinnaaneranut misiligutissanik tigusinissaq sunaluunniit ilinniarfiup imaluunniit ilinniagaqartut ineqarfiata aangajaarniutininik atueqqusinninnermut aalajangersagaanik unioqqutitsisoqarsimasinnaaneranik tigussaasumik pasitsaassaqaartoqarnera tunngavigalugu taamaallaat pisinnaavoq"

Demokraatini isumarput naapertorlugu oqaaseqatigiit taakku ilinniartut ataasiakkaat inatsisitigut illersorneqarnissaannik qularnaaripput. Aamma isumaqatigiissutigaarput, ilinniakkat aalajangersimasut eqqarsaatigalugit periarfissaqassasoq - Naalakkersuisunut qinnuteqareernerup kingorna - sattalluni misissuisoqartarsinnaanissaa isumannaatsuunissaq pillugu. Tamatta soqutigisariaqarparput suna tamaat atorlugu ilinniarfiutitsinni ajunaartoqannginnissaata qularnaarnissaa aamma qularutissaanngilaq assersuutigalugu ilinniartut aanngajaarniutininik atuisimallutik lastbilinik ingerlatitsigunik avatangiisiminnik ulorianartorsiortitsisinnaammata.

Demokraatini aamma iluarisimaarparput ilinniarfiit ataasiakkaat/ilinniartut najugaqarfiisa ataasiakkaat namminneq aalajangertassammassuk, malittarisassiussanerlutik periarfissaqalersillugu aanngajaarniutininik atuisimanermut misissuisoqartarnissaa. Taamaasilluni nammineq piunassuseq ilinniarfiillu aalajangiisinnatitaanerat qularnaarneqassaaq aamma



ilinniarfiit ataasiakkaat namminneq aalajangissavaat ilumut pisariaqarnersoq malittarisassaqaarnissaq periarfissaqalersillugu aanngajaarniutinut misissuisarnissaq.

Tamatuma saniatigut nuannaarutigaarput § 10 -mi allassimammat, atuisimaneq paasineqarpat aallaqaammut "taamaallaat" mianersoqqussummik tunisisoqarsinnaasoq. Allatut oqaatigalugu ataasiaannarluni unioqqutitsisimangaanni taava ilinniartup ilinniassallugu pilerigisani unitsiinnartariaqanngilaa. Tamanna pingaaruteqarpoq, tamattami kukkuluttorsinnaasaratta.

Taamatut oqaaseqarluta Demokraatini siunnersuummut ilaliinerput oqaatigissavarput innersuussutigalugulu siunnersuutip aappassaaneerneaqannginnerani Ilinniartitaanermut, Kultureqarnermut, Ilisimatusarnermut Ilageeqarnermullu Ataatsimiititaliami suliarineqaqqissasoq.